

Ufficio Stampa della Provincia autonoma di Trento
Piazza Dante 15, 38122 Trento
Tel. 0461 494614 - Fax 0461 494615
uff.stampa@provincia.tn.it

COMUNICATO n. 2584 del 07/09/2023

Traduzione in cimbri

Didjital dèstar: von 20 von herbestmånat hevanda å di tagung online

Pisto guat zo giana z'sega doi eletronege krånkhblatt? Boasto bia zo nütza in SPID? Boasto ombrómm 'z izta mångl zo bèksla 'z passbort von doi komputer odar von hanttelefon? Khennsto di dienst online boda gitt di Provìntz un di sèlln boma vennt aftn Portàl Trentino Lavoro? Bichtege vorsch, boda ågian in lem vo alle tage, zo rispundra disan vorsch mochtma khånen mearare sachandarn un hãm mearare didjitaln kompetenzan boda vil vert di laüt nèt hãm. Abezolirna di pürger von Trentino zo haba dise didjital kompetenzan izta khent augelekk dar prodjekt "Punto digitale facile" gezalt pinn gèlt von PNRR drinn in an grözarn prodjekt gehoazt "Rete dei servizi di facilitazione digitale" von Dipartimènt vor da Didjital Bèkslom durchgeviart vodar autonome Provìntz vo Tria boda, pittnandar pitt Tsm-Trentino School of Management, hatt augelekk zen trèff online atz tème boda soinn gehaltet gantz bichte zo maga inngian afte didjitaln dienst .

Di trèff soinn åna zo mocha zahn un offe vor alle sin azta bart soinn platz. Zo nemma toal mochtmasse innschraim. Dar earst trèff bart soinn an mitta atz 20 von herbestmånat, vo di vünve sin di sèkse in tages un bart soinn über in tème vodar informatege sicharom. Di tagung online soinn toal vonan prodjekt ågeheft auz pan summar balda soinn khent offegetant vünf schaltarla in di lentar vo Cavalese, Malè, Rovrait, Tione un Tria, da di pürger mang gian, åna zo mocha zahn, zo haba hilfe, z'soina abegelirnt zo nütza di didjitaln dienst un di didjitaln teknolodjie.

Åndre vünf schaltarla bartn khemmen offegetant in di bochan boda khemmen atz Riva aftn Garda sea, Pèrsan, Burge, Primiero un Sèn Jan in Fassa Tal. Vorda auz iz 'z djar 2024 bartnsa soinn 22 di schaltarla vor di pürger ankunto dar mittarbat pinn Konsòrtzio von Trentinar Kamöünder. Dar dienst iz åna z'zala un offe vor alle di laüt vo aniaglana eltom un aniaglana kompetèntz. 'Z iz genumma vorsan z'soina ågenump durch in istituzionàl portàl vodar Provìntz: www.provincia.tn.it/Digitale-Facile.

Innoschraibase afte tagung online makma gian afte websait vo Trentino School of Management: <https://www.tsm.tn.it/attivita/punto-digitale-facile-seminari-online>.

'Z izta o darzuar dar grümma nummar åna z'zala, **800228040**, boma mage vorsan z'soina någeholt un allz daz sèll boma bil bizzan zo vorsa konsuléntz odar innoschraibase afte tagung online.

Da untar di interviste dar Cristiana Pretto, djeneràl diridjènt Umst semplifikatzion un didjitalizatzion vodar autonome Provìntz vo Tria un in Nicola Villa, vüarar von didjital bèkslom un vornaügarum Zentrum vo Tsm:

<https://www.youtube.com/watch?v=bFc4vj0iiME&t=2s>

Übersetzt von Schaltarle vor di zung von Toalkamou vodar Zimbar Hoachebene

(cdt)